



REPUBLIKA E SHQIPËRISË  
UNIVERSITETI I ARTEVE  
SENATI AKADEMIK

Nr. 509/Prot.  
3

Tiranë, më 24/05/2023

VENDIM

Nr. 26, datë 24/05/2023

MBI

**“MIRATIMIN E RREGULLORES PËR ZGJEDHJET E KËSHILLIT STUDENTOR NË  
UNIVERSITETIN E ARTEVE”**

Senati Akademik i Universitetit të Arteve, mbështetur në nenin 38, pika 1, shkronja d dhe nenin 99 të ligjit nr. 80/2015, për “*Arsimin e lartë dhe kërkimin shkencor në institucionet e arsimit të lartë në Republikën e Shqipërisë*”, në nenin 24, pika 1, shkronja g dhe nenin 127 e vijues të Statutit të Universitetit të Arteve, si dhe në shkresën grupit të punës me lëndë “*Dërgim i Rregullores Për Zgjedhjet e Këshillit Studentor në Universitetin e Arteve*”, pasi e shqyrtoi dhe diskutoi,

**V E N D O S I:**

1. Miratimin e Rregullores Për Zgjedhjet e Këshillit Studentor në Universitetin e Arteve, sipas materialit bashkëlidhur këtij vendimi.
2. Ngarkohen për zbatimin e këtij vendimi gjithë strukturat përbërëse të Universitetit të Arteve.
3. Ky vendim të publikohet në faqen zyrtare të Universitetit të Arteve dhe tek transparenca.

**Ky vendim hyn në fuqi menjëherë.**





REPUBLIKA E SHQIPËRISË

SENATI AKADEMIK I UNIVERSITETIT TË ARTEVE

Prof. Kastriot ÇAUSHI

Prof. Najada HAMZAJ

Prof. Dr. Isak SHEHU

Prof. Petrit MALAJ

Prof. Artan PEQINI

Prof. Vladimir MYRTEZAJ (GROSHA)

Prof. Arben LLOZI

Prof. Ilir MARTINI

Prof. Asoc. Dorian ÇENE

Prof. Gazmend GJOKA

Prof. Asoc. Dr. Kastriot TUSHA

Prof. Dr. Erald BAKALLI

Prof. Endri SINA

Prof. Asoc. Edmond GJIKOPULLI

Prof. Asoc. Albes FUSHA

Prof. Asoc. Zamir KOKONOZI

Prof. Asoc. Genci FUGA

Erlind FUSHA (Student FAB)


Sindi ZDRAVA (Studente FM)



UNIVERSITETI I ARTEVE



RREGULLORE  
PËR  
ZGJEDHJET E KËSHILLIT STUDENTOR NË  
UNIVERSITETIN E ARTEVE



*Miratuar me Vendim të Senatit Akademik*  
Nr. 26 datë 24/05/2023

## P Ë R M B A J T J A

Kreu	Faqe
I. Dispozita të përgjithshme	3
II. Përgatitja dhe administrimi i zgjedhjeve	4
III. Zgjedhësit dhe lista e zgjedhësve	7
IV. Regjistrim i kandidatëve për anëtar të këshillit studentor të UART dhe fushata zgjedhore	8
V. Përgatitja e infrastrukturës dhe e dokumentacionit për zgjedhjet	9
VI. Votimi	10



## **KREU I DISPOZITA TË PËRGJITHSHME**

### **Neni 1**

#### **Baza ligjore**

Rregullorja për zgjedhjet e këshillit studentor në Universitetin e Arteve, mbështetet në ligjin nr. 80/2015, datë 22.07.2015 arsimin e lartë dhe kërkimin shkencor në institucionet e arsimit të lartë në Republikën e Shqipërisë', neni 99, Statutin e Universitetit të Arteve, nenet 121,122,123,130,131 Rregulloren e UART, dhe Statutin e Këshillit Studentor të Universitetit të Arteve.

### **Neni 2**

#### **Objekti i rregullores**

Kjo rregullore përcakton rregullat për përgatitjen, organizimin, zhvillimin, administrimin, mbikëqyrjen dhe shpalljen e rezultateve të zgjedhjeve për kryetarin dhe anëtarët e Këshillit Studentor të Universitetit të Arteve, si dhe kushtet dhe afatet për regjistrimin e kandidatëve, të drejtat dhe detyrimet e tyre, dokumentacionin zgjedhor, listat e zgjedhësve, fushatën zgjedhore, rregullat për organizimin dhe funksionimin e administratës zgjedhore, kriteret për hartimin e listës së zgjedhësve, procedurat për votimin, vlerësimin dhe numërimin e votave, shpalljen e rezultateve, procedurat për shqyrtimin e ankimimeve, si dhe rregullat për administrimin dhe ruajtjen e dokumentacionit.

### **Neni 3**

#### **Subjekti i rregullores.**

1. Kjo rregullore i shtrin efektet e saj për zgjedhjen e Këshillit Studentor të Universitetit të Arteve.
2. Subjekti i saj janë studentët me kohë të plotë të të gjitha programeve të studimit të fakulteteve të Universitetit të Arteve, përkatësisht:
  - a. studentët e programeve të ciklit të parë Bachelor;
  - b. studentët e programeve të ciklit të dytë Master i Arteve, Master Shkencor dhe Master Profesional.
3. Çdo student ka të drejtën e zgjedhjes dhe të të zgjedhurit për përfaqësuesit e studentëve (kryetar dhe anëtar) në Këshillin Studentor të UART dhe në përputhje me dispozitat e parashikuara në këtë rregullore dhe me bazën ligjore të përshkruar në nenin 2 të saj.

### **Neni 4**

#### **Parimet e përgjithshme**

1. Zgjedhjet për kryetar dhe anëtarë të Këshillit Studentor të UART, mbahen në mënyrë periodike, çdo 2 (dy) vjet.
2. Këshilli Studentor i UART, përbëhet nga 9 (nëntë) përfaqësues të studentëve, përkatësisht:
  - a. 3 (tre) anëtarë nga Fakulteti i Muzikës (nga një anëtar për çdo departament);
  - b. 3 (tre) anëtarë nga Fakulteti i Artit Skenik (nga një anëtar për çdo departament);
  - c. 3 (tre) anëtar nga Fakulteti i Arteve të Bukura (nga një anëtar për çdo departament);
  - d. Kryetari zgjidhet nga të 9-të përfaqësuesit e zgjedhur nga fakultetet e UART.
3. Zgjedhjet bëhen me votim të lirë e të fshehtë, sipas përcaktimeve të kësaj rregulloreje.

4. Çdo votues ka të drejtën e një vote të vetme.
5. Të drejtën për t'u zgjedhur si përfaqësues në Këshillin Studentor e ka çdo student që vetëkandidohet, sipas përcaktimeve të kësaj rregulloreje.
6. Çdo kandidat ka të drejtën të organizojë dhe të zhvillojë aktivitete për paraqitjen e programit të tij, duke mos cenuar procesin mësimor. Shpallet i zgjedhur në pozicionin e anëtarit të këshillit studentor kandidati që fiton numrin më të madh të votave të vlefshme të zgjedhësve që marrin pjesë në votim, me përjashtim të kandidatëve të vetëm të cilët duhet të marrin 50 % + 1 të votave të vlefshme,
7. Çdo kandidat ka të drejtë të ketë vëzhguesit e tij në qendrën e votimit, në qendrën e numërimit të votave, në KZS-në e fakultetit përkatës. Listën me emrat e vëzhguesve kandidati e depoziton pranë KIZS 3 (tre) ditë pas aplikimit të tij si kandidat.
8. Për kandidatët që fitojnë numër të barabartë votash, përzgjedhja për anëtar të Këshillit Studentor të UART bëhet në bazë të mesatares së notave ku studenti/studentja që ka mesatare më të lartë fiton.

### **Neni 5**

#### **Periudha zgjedhore dhe thirrja e zgjedhjeve**

1. Periudha zgjedhore dhe data e zgjedhjeve, shpallet me vendim të Rektorit të UART. Brenda kësaj periudhe, duhet të respektohen afatet e nevojshme për krijimin e komisioneve përkatëse dhe zhvillimin e fushatës zgjedhore.
2. Qendrat e votimit hapen në orën 9:00 dhe mbyllen në orën 15:00. Askush nuk mund të votojë pasi komisionet e qendrave të votimit të fakulteteve të UART marrin vendim për mbylljen e votimit, pasi janë siguruar për votimin e të gjithë studentëve që janë në radhë, në pritje të votimit, në orarin e mbylljes së votimit.

## **KREU II**

### **PËRGATITJA DHE ADMINISTRIMI I ZGJEDHJEVE**

#### **Neni 6**


#### **Komisioni Institucional Zgjedhor Studentor i Universitetit të Arteve. (KIZS)**

Komisioni Institucional Zgjedhor Studentor i UART, është organi përgjegjës për organizimin dhe administrimin e procesit zgjedhor për Këshillin Studentor. Ai përbëhet nga anëtarë, të cilët zgjedhin të mos kandidojnë për anëtarë të këshillit studentorë të UART.

#### **Neni 7**

#### **Përbërja dhe funksionet e KIZS**

1. KIZS në UART, përbëhet prej 10 (dhjetë) anëtarësh. Prej tyre 9 (nëntë) anëtarë gëzojnë të drejtë vote. Sekretari/ja e KIZS nuk ka të drejtë vote.
2. Përbërja e anëtarëve me të drejtë vote është përkatësisht si më poshtë:
  - a. 3 (tre) anëtarë nga Fakulteti i Muzikës;
  - b. 3 (tre) anëtarë nga Fakulteti i Artit Skenik;
  - c. 3 (tre) anëtarë nga Fakulteti i Arteve të Bukura;
3. Kryetari i KIZS zgjidhet nga anëtarët e këtij komisioni në mbledhjen e parë të konstituimit të tij si komision;
4. Sekretari KIZS, përzgjidhet me short nga përfaqësuesit e zgjedhur nga secili fakultet për këtë pozicion. Shortin për këtë pozicion e organizon KIZS, pas konstituimit dhe zgjedhjes së kryetarit.



5. Dekanatet e fakulteteve përzgjedhin dhe shpallin me vendim të dekanit anëtarët përfaqësues të KIZS dhe 1 (një) përfaqësues për pozicionin e sekretarit jo më vonë se 15 (pesëmbëdhjetë) ditë nga data e shpalljes së periudhës zgjedhore, nga lista e studentëve të vetëkandiduar, të cilët regjistrohen në sekretarinë mësimore të fakultetit përkatës.
6. Në mbledhjen e parë, KIZS zgjedh kryetarin me votim të fshehtë, me shumicë të thjeshtë të votave (50%+1) të anëtarëve të saj, Rezultati i zgjedhjes publikohet nga KIZS në të gjitha mjediset e universitetit.
7. Gjatë periudhës zgjedhore, KIZS mblidhet jo më pak se 3 (tre) herë në javë. Mbledhja thirret nga kryetari ose të paktën nga 2 (dy) anëtarë. Mbledhja është e vlefshme kur marrin pjesë jo më pak se 2/3 e të gjithë anëtarëve. Mbledhjet e KIZS janë të hapura për çdo kandidat.
8. KIZS i merr vendimet me shumicë të thjeshtë të të gjithë anëtarëve (50%+1). Vendimet e KIZS publikohen në mjediset e UART, jo më vonë se 24 orë pas vendimmarrjes.
9. KIZS ka këto kompetenca:
  - a. nxjerr udhëzime për organizimin dhe zhvillimin e procesit zgjedhor;
  - b. drejton dhe kontrollon të gjithë procesin zgjedhor;
  - c. zgjedh me votim kryetarin dhe përzgjedh sekretarin e komisionit zgjedhor studentor të UART;
  - d. miraton vulën për KIZS dhe për KZS sipas fakulteteve, të cilat prodhohen dhe administrohen sipas kuadrit ligjor në fuqi;
  - e. regjistron kandidatët për anëtar të këshillit studentor sipas fakulteteve të UART;
  - f. shpall rezultatin e zgjedhjeve për kryetar dhe anëtar të këshillit studentor sipas fakulteteve të UART;
  - g. administron, gjykon dhe merr vendim për ankimimet që regjistrohen prej kandidatëve.
10. Mandati i anëtarit të KIZS ndërpritet në rastet kur:
  - a. kryen veprimtari në favor të një kandidati;
  - b. jep dorëheqjen nga detyra;
  - c. dënohet për vepra penale me vendim gjyqësor të formës si prerë;
  - d. me veprimet dhe mosveprimet e tij cenon rëndë veprimtarinë e komisionit dhe procesin zgjedhor;
  - e. mungon, pa shkaqe të arsyeshme, në 3 (tri) mbledhje radhazi;
  - f. humbet statusin e studentit;
  - g. ndërron jetë.
11. Vendi i mbetur bosh në KIZS, brenda 24 orëve, plotësohet nga dekanati i fakultetit të cilit i përket anëtari që i është ndërprerë mandanti, prej listave të studentëve të vetëkandiduar të depozituara në sekretarinë mësimore të fakultetit përkatës.
12. Sekretari i KIZS përgatit materialet për çdo mbledhje të tij. Ai merr pjesë në mbledhje, mban procesverbalet e mbledhjeve dhe, për çdo rast, jep shpjegime për çështjet që i kërkohen. Procesverbali i mbledhjeve duhet të firmoset nga anëtarët e pranishëm në mbledhje dhe të firmoset e vuloset nga sekretari. Sekretari i KIZS është përgjegjës për administrimin e të gjithë dokumentacionit të komisionit. Vendimet e komisionit firmosen prej të gjithë anëtarëve dhe vulosen me vulën e KIZS. Çdo anëtar i KIZS, krahas nënshkrimit të tij, mund të deklarojë në vendim votën kundër.  
Kohëzgjatja e mandatit të KIZS të UART, është 2-vjeçar.

**Neni 8**  
**Komisioni i Apelit Studentor (KAS)**



1. KAS-i përbëhet prej 3 (tre) anëtarësh, 1 (një) anëtar për secilin fakultet, të cilët zgjedhin mes tyre kryetarin. Anëtarët e KAS-it nuk kanë të drejtë të kandidojnë për anëtar të këshillit studentor.
2. Dekanatet e fakulteteve përzgjedhin dhe shpallin me vendim të dekanit anëtarin përfaqësues të KAS-it jo më vonë se 15 (pesëmbëdhjetë) ditë nga data e shpalljes së periudhës zgjedhore, nga lista e studentëve të vetëkandiduar, të cilët regjistrohen në sekretarinë mësimore të fakultetit përkatës.
3. Në mbledhjen e parë, KAS zgjedh kryetarin, me votim të fshehtë, me shumicë të thjeshtë të votave (50 % +1) të anëtarëve të tij. Rezultati i zgjedhjes publikohet nga KAS në mjediset e UART.
4. Gjatë periudhës zgjedhore, KAS mbledhet vetëm për të marrë në shqyrtim kërkesat e drejtuara nga kandidatët. Mbledhja është e vlefshme kur marrin pjesë jo më pak se 2/3 e të gjithë anëtarëve. Mbledhjet e KAS janë të hapura për çdo kandidat dhe çdo anëtar të KIZS të UART, prania e të cilëve është e lejuar.
5. KAS merr vendimet me shumicën e thjeshtë të të gjithë anëtarëve të tij (50% + 1). Vendimet e KAS publikohen në mjediset e UART, jo më vonë se 24 orë pas vendimmarrjes.
6. KAS ka këto kompetenca:
  - a. shqyrton dhe merr vendim të arsyetuar, në të cilin përfshihen dhe mendimet "kundër", për çdo ankim për vendime të marra prej KIZS;
  - b. administron, gjykon dhe merr vendim për ankimimet që regjistrohen prej kandidatëve;
  - c. dërgon për dijeni në KIZS vendimet e marra për ankesat që janë paraqitur pranë tij.
7. Vendimi i KAS është i formës së prerë, përfundimtar dhe i detyrueshëm për t'u zbatuar.
8. Mandati i anëtarit të KAS ndërpritet në rastet kur:
  - a. kryen veprimtari në favor të një kandidati;
  - b. jep dorëheqjen nga detyra;
  - c. dënohet për vepra penale me vendim gjyqësor të formës së prerë;
  - d. me veprimet dhe mosveprimet e tij cenon rëndë veprimtarinë e komisionit dhe procesin zgjedhor;
9. Vendi i mbetur bosh në KAS, brenda 24 orëve, plotësohet nga dekanati i fakultetit të cilit i përket anëtarit që i është ndërprerë mandati, prej listave të studentëve të vetëkandiduar

## Neni 9

### Komisionet Zgjedhore Studentore (KZS)

1. Vendimi për ngritjen e KZS merret nga KIZS jo më vonë se 3 (tre) ditë kalendarike nga dita e formimit të tij.
2. Anëtarët e KZS nuk kanë të drejtë të kandidojnë për anëtar të këshillit studentor.
3. Anëtarët e KZS të fakulteteve të UART do të zgjidhen me short nga KIZS nga lista e studentëve të vetëkandiduar për këtë komision.
4. KZS në fakultetet e UART përbëhen nga 3 (tre) anëtarë, (nga 1 anëtar për çdo departament) të cilët në mbledhjen e parë pas konstituimit, zgjedhin mes tyre kryetarin dhe sekretarin me votim të hapur dhe me shumicë të thjeshtë (50% +1 votë).
5. Sekretari përgatit materialet për çdo mbledhje të KZS. Ai merr pjesë në mbledhje, mban procesverbalet e mbledhjeve dhe, për çdo rast, jep shpjegime për çështjet që i kërkohen. Procesverbali i mbledhjeve duhet të firmoset nga anëtarët e pranishëm në mbledhje dhe nga sekretari. Sekretari është përgjegjës për



administrimin e të gjithë dokumentacionit të KZS. Vendimet firmosen prej gjithë anëtarëve të KZS. Ditën e votimit, vendimet e marra firmosen dhe vulosen nga KZS me vulën e marrë nga KIZS bashkë me materialet zgjedhore.

6. KZS i marrin vendimet me shumicë të thjeshtë ( $50\%+1$ ) të të gjithë anëtarëve të tyre.
7. KZS kanë këto kompetenca:
  - a. përgjigjen për administrimin dhe zhvillimin e procedurave të votimit për trupën zgjedhore studentore të fakultetit përkatës;
  - b. pas përfundimit të procesit të votimit, fillojnë procesin e numërimit të votave, rezultatin e të cilave e pasqyrojnë në procesverbalet dhe tabelat përkatëse.
  - c. hartojnë tabelën përfundimtare të rezultateve të votimit dhe shpallin, me vendim të veçantë, rezultatet e votimeve për anëtarët e këshillit studentor të fakultetit përkatës.
8. Mandati i anëtarit të KZS ndërpritet në rastet kur:
  - a. kryen veprimtari në favor të një kandidati;
  - b. jep dorëheqjen nga detyra;
  - c. me veprimet dhe mosveprimet e tij cenon rëndë veprimtarinë e komisionit dhe procesin zgjedhor;
  - d. mungon, pa shkaqe të arsyeshme, në 3 (tre) mbledhje radhazi;
  - e. humbet statusin e studentit;
  - f. ndërron jetë.
9. Vendi i mbetur bosh plotësohet nga KIZS brenda 24 (njëzet e katër) orëve nga lista e kandidatëve që janë vetëkandiduar në sekretarinë e komisionit.
10. Në ditën e zgjedhjeve, Komisioni Zgjedhor Studentor (KZS) do të ushtrojë funksionin e Komisionit të Qendrës së Votimi.

### **Neni 10**

#### **Qendrat e votimit**

Votimi kryhet në qendrat e votimit të cilat ngrihen nga një për çdo fakultet të UART.

Në të gjitha qendrat e votimit të mësipërme votohet për anëtarë të këshillit studentor të fakultetit përkatës.

### **KREU III**

#### **ZGJEDHËSIT DHE LISTA E ZGJEDHËSVE**

### **Neni 11**

#### **Zgjedhësit dhe përgatitja e listës së zgjedhësve**

1. Kanë të drejtën e zgjedhjes studentët me kohë të plotë të ciklit të parë dhe të dytë të programeve të studimit në fakultetet e Universitetit të Arteve.
2. Kanë të drejtën për të kandiduar të gjithë studentët me kohë të plotë të ciklit të parë dhe të ciklit të dytë, në përputhje me kriteret e përcaktuara në këtë rregullore.
3. Organi përgjegjës për hartimin e listës së zgjedhësve është sekretaria mësimore e fakultetit përkatës, duke ndarë më vete listat sipas secilit departament dhe cikël studimi.
4. Procedura për hartimin e listës së zgjedhësve është si më poshtë vijon:
  - a. Lista paraprake e studentëve hartohet nga sekretaria mësimore jo më vonë se 3 (tre) ditë nga shpallja e ditës së zgjedhjeve.
  - b. Lista paraprake afishohet në mjediset e fakulteteve përkatëse.



- c. Gjatë një periudhe deri në 5 (pesë) ditë pas shpalljes së listës paraprake, sekretaria mësimore pranon kërkesat për korrigjime.
- d. Pas verifikimit të kërkesës, sekretaria mësimore realizon korrigjimin e kërkuar brenda 24 orësh.
- e. Pas përfundimit të afatit për korrigjimin e listës, sekretaria mësimore harton listën përfundimtare, e cila miratohet nga dekani i fakultetit përkatës.
5. Lista e zgjedhësve afishohet në mjediset e fakultetit përkatës dhe një kopje e listës i dërgohet KIZS. Lista e miratuar duhet të jetë e firmosur në çdo faqe prej dekanit dhe e vulosur me vulën e fakultetit përkatës.

## **KREU IV REGJISTRIMI KANDIDATËVE PËR ANËTAR TË KËSHILLIT STUDENTOR TË UART DHE FUSHATA ZGJEDHORE**

### **Neni 12**

#### **Regjistrimi kandidatëve**

1. Procesi i regjistrimit të kandidatëve për anëtar të këshillit studentor të UART sipas fakulteteve, bëhet nga Komisioni Zgjedhor Institucional Studentor. Data për fillimin e procedurës për regjistrimin e kandidatëve shpallet prej KIZS pas ditës së konstituimit të tij dhe zgjat 10 ditë kalendarike.
2. Dokumentet e kandidimit duhet të jenë në përputhje me kërkesat e kësaj rregulloreje.

### **Neni 13**

#### **Dokumentacioni për kandidim**

1. Dokumentacioni për kandidim nga kandidatët dorëzohet në KIZS dhe përmban:
  - a. kërkesën për kandidim e cila përfshin: emrin, atësinë, mbiemrin, datëlindjen, gjininë dhe shprehjen e vullnetit për kandidim për anëtar të këshillit studentor të UART sipas fakultetit;
  - b. fotokopjen e dokumentit të identifikimit;
  - c. vërtetimin që provon se është student me kohë të plotë pranë fakultetit përkatës;
  - d. listën e notave të fituara deri në momentin e kandidimit (nota mesatare duhet të jetë mbi 8 (tetë)).
2. Pas verifikimit të dokumentacionit, KIZS, jo më vonë se 24 (njëzet e katër) orë nga përfundimi i afatit të paraqitjes së kërkesave për kandidim, miraton listat e kandidatëve për kryetar dhe anëtarë të këshillit studentor të fakulteteve përkatëse, sipas përcaktimeve të kësaj rregulloreje. Listat përcillen në komisionet studentore të fakulteteve dhe shpallen publikisht nga këto të fundit menjëherë në mjediset e fakultetit përkatës.

### **Neni 14**

#### **Kohëzgjatja e mandateve**

Kryetari dhe anëtarët e Këshillit Studentor të Universitetit të Arteve zgjidhen për një mandat 2-vjeçar.

### **Neni 15**

#### **Fushata zgjedhore**

1. Fushata zgjedhore fillon një ditë pas shpalljes së kandidatëve të regjistruar.
2. Fushata zgjedhore përfundon 24 orë para ditës së zgjedhjeve. Dita para datës së zgjedhjeve dhe data e zgjedhjeve deri në mbylljen e votimit formojnë periudhën



e heshtjes zgjedhore. Në periudhën e heshtjes zgjedhore nuk lejohet asnjë lloj fushate zgjedhore.

3. Administratori i UART dhe administrata e fakulteteve të UART, krijojnë kushte të përshtatshme dhe të barabarta për të gjithë kandidatët për të zhvilluar aktivitetin e tyre në kuadër të fushatës elektorale. Në përputhje me kërkesën e kandidatit për kohën dhe vendin për zhvillimin e aktivitetit, administrata e fakulteteve të Universitetit të Arteve, merr të gjitha masat e nevojshme për zhvillimin e tij, pa cenuar procesin mësimor, si dhe përcakton mjediset dhe plotëson kërkesat e komisioneve të ngritura në fakultetin përkatës, me qëllim zhvillimin e zgjedhjeve.

## **KREU V PËRGATITJA E INFRASTRUKTURËS DHE E DOKUMENTACIONIT PËR ZGJEDHJET**

### **Neni 16**

#### **Vendndodhja e komisioneve zgjedhore dhe vendeve të numërimit të votave**

1. Vendndodhja e komisioneve zgjedhore përcaktohet sipas rregullit të mëposhtëm;
  - a. Selia e KIZS dhe KAS-it vendoset në ambientet e përcaktuara nga Rektorati UART.
  - b. Selitë e KZS vendosen në godinat përkatëse të fakulteteve të UART të cilat shërbejnë edhe si vendet e votimit dhe numërimit të votave dhe përcaktohen nga Dekanatet përkatëse.

### **Neni 17**

#### **Komisionet për vlerësimin dhe numërimin e votave**

1. Votat vlerësohen dhe numërohen prej KZS të fakulteteve përkatëse të UART.
2. KZS-të e fakulteteve përkatëse të UART, pas numërimit të votave, plotësojnë tabelën zgjedhore dhe ia përcjellin atë KIZS.
3. KIZS shpall rezultatet e zgjedhjeve sipas përcaktimeve në këtë rregullore dhe, pas kalimit të afateve për ankimimin, shpall fituesit e zgjedhjeve.

### **Neni 18**

#### **Përgatitja e dokumentacionit zgjedhor**

1. Sasia e fletëve të votimit është e barabartë me numrin e zgjedhësve sipas listave përkatëse, plus 1% e tyre.
2. Forma e fletës së votimit përgatitet prej KIZS.
3. Fletët për anëtarë të këshillit studentor të fakultetit përkatës të UART kanë ngjyra të ndryshme.
4. Fleta duhet të jetë me specifika të tilla që të mos lejojnë manipulimin e tyre.
5. Fleta duhet të jetë prej letre format A4, me ngjyrë dhe trashësi që të mos lejojë leximin e votës në pjesën e pasme të saj.
6. Fletët e votimit përmbajnë informacionet e mëposhtme:
  - a. Në to vendosen emrat e kandidatëve për anëtarë të këshillit studentor të fakultetit përkatës të UART.
  - b. Të gjitha fletët e votimit vulosen me vulën e KIZS përpara se të dërgohen në KZS e fakulteteve.

### **Neni 19**

#### **Dërgimi i materialeve zgjedhore nga KIZS në KZS e fakulteteve të UART**

1. Një ditë përpara datës së zgjedhjeve KIZS dërgon në KZS e fakulteteve të UART kutinë me materialet zgjedhore, si më poshtë vijon:

- a. fletët e votimit të vulosura me vulën e KIZS në përputhje me numrin e votuesve +1%;
  - b. listën e zgjedhësve;
  - c. vulën e KZS të secilit fakultet;
  - d. procesverbalet e qendrës së votimit, ku bëjnë pjesë procesverbalet për vulosjen e kutive të votimit, hapjen e qendrës së votimit, pezullimin e votimit, si dhe mbylljen e votimit;
  - e. zarfin në të cilin është shënuar "Fletëvotimi të dëmtuara"
  - f. zarfin në të cilin është shënuar "Fletëvotimi të papërdorura";
  - g. zarfin në të cilin është shënuar "Zarfi procesverbalit të vulosjes".
2. Përveç kutisë me materialet zgjedhore, në KZS dërgohen edhe kutitë e votimit, tabelat për rezultatin e zgjedhjeve, dhomat e fshehta dhe vulat me kodet e sigurisë.
  3. KZS shpërndan bazën materiale të nevojshme për zhvillimin e votimit në QV-të e ngritura në fakultetin përkatës. Ky proces bëhet ditën e zgjedhjeve, përpara fillimit të procesit të votimit, si dhe pasqyrohet në procesverbalin përkatës.

## **KREU VI VOTIMI**

### **Neni 20**

#### **Veprimet paraprake për hapjen e qendrës së votimit**

1. Për anëtarë të këshillit studentor të fakultetit, në çdo qendër votimi votohet në 3 (tre) kuti votimi, nga një për secilin departament të cilat janë të dallueshme nga njëra-tjetra.
2. KZS nën drejtimin e kryetarit, një orë përpara hapjes së qendrës së votimit, kryejnë këto detyra:
  - a. vendosin tryezat, karriget, dhomat e fshehta dhe kutitë e votimit, në mënyrë të tillë që të sigurohet fshehtësia e votimit, si edhe lëvizja e shpejtë dhe e lirshme e zgjedhësve;
  - b. afishojnë udhëzimet për kryerjen e votimit në një vend të përshtatshëm dhe të dukshëm brenda qendrës së votimit;
  - c. kontrollojnë të gjitha materialet e marra në dorëzim;
  - d. u tregojnë të pranishmëve kutitë e votimit të zbrazëta;
  - e. mbyllin kutitë e votimit dhe i shkruajnë kodet në procesverbalin e vulosjes së kutive të votimit dhe në librin e protokollit të mbledhjeve, i cili nënshkruhet nga të gjithë anëtarët e KZS.
3. Procesverbali mbyllet në zarfin ku është shkruar "Zarfi procesverbalit të vulosjes", i cili futet në kutinë e votimit. Anëtarët e KZS marrin vendim për hapjen e votimit dhe e nënshkruajnë atë.

### **Neni 21**

#### **Procedurat e votimit**

1. Votimi për anëtarë të këshillit studentor të UART bëhet në të njëjtën ditë në të gjitha fakultetet, në datën e caktuar nga Rektorati i UART. Pas kryerjes së detyrave të përcaktuara në këtë rregullore, kryetari i KZS të fakultetit përkatës, deklaron hapjen e votimit, por jo më vonë se ora 09:00.
2. Fletët e votimit janë të vulosura në pjesën e pasme, në vendin e caktuar, me vulën e KIZS. Zgjedhësit qëndrojnë në radhë jashtë qendrës së votimit dhe futen njëri pas tjetrit në qendrën e votimit për të votuar, me thirrjen e një anëtari të komisionit. Pasi zgjedhësi hyn në qendrën e votimit:



- a. thotë emrin e tij dhe paraqet para komisionit një nga dokumentet zyrtare të vlefshme të identifikimit:
    - letërnjoftim ID (kartë identiteti);
    - pasaportë;
    - vërtetim nga sekretaria e fakultetit përkatës.
  - b. kryetari, pasi verifikon se të dhënat e identitetit të zgjedhësit përputhen me të dhënat në listën e zgjedhësve dhe se zgjedhësi është i njëjtë me personin në dokumentin e identitetit, shënon në listën e zgjedhësve llojin dhe numrin e serisë së dokumentit të identitetit dhe i heq vizë emrit të zgjedhësit në këtë listë;
  - c. nënshkruan në listën e zgjedhësve anash emrit të tij;
  - d. kryetari vulos fletën e votimit me vulën e KZS-së dhe ia jep zgjedhësit;
  - e. zgjedhësi pasi merr fletët e votimit, hyn në dhomën e fshehtë dhe në krah të emrit të kandidatit, shënon shenjën "x", "+", brenda kuadrantit të përcaktuar për shënim nga ana e zgjedhësit,
  - f. pasi bën shënimin në fletën e votimit, palos fletët në mënyrë që shenja të mos jetë e dukshme, del nga dhoma e fshehtë, e hedh fletën në kutinë përkatëse të votimit dhe largohet nga qendra e votimit.
3. Qendra e votimit organizohet në një mënyrë të tillë që të lehtësojë procesin e votimit dhe të garantojë plotësisht fshehtësinë e votës.
  4. Në qendrën e votimit është i ndaluar përdorimi i mjeteve të komunikimit apo regjistrimit nga ana e votuesit.
  5. Në qendrën e votimit mund të qëndrojnë vetëm:
    - a. anëtarët e KZS dhe vëzhguesit e miratuar nga KIZS për llogari të kandidatëve;
    - b. zgjedhësit që janë duke kryer procedurat e votimit, deri në përfundim të tyre.

## **Neni 22**

### **Mbyllja e votimit**

1. Qendrat e votimit mbyllën në orën 15:00. Nëse edhe pas kalimit të këtij orari ka zgjedhës që presin në radhë, komisioni mbledh dokumentet e identifikimit të të gjithë zgjedhësve të pranishëm dhe i thërret ata me radhë për të kryer votimin.
2. Asnjë zgjedhës tjetër nuk do të lejohet të votojë nëse nuk ka qenë në radhë në kohën e mbledhjes së dokumentit të identifikimit. Pasi voton edhe zgjedhësi i fundit i pranishëm, komisioni merr vendim për mbylljen e votimit, duke plotësuar formularin përkatës, ku shënohet edhe ora e mbylljes së votimit. Pas kësaj, në qendrën e votimit mund të qëndrojnë vetëm anëtarët e komisionit.

## **Neni 23**

### **Veprimet pas mbylljes së qendrës së votimit**

1. Pas marrjes së vendimit për mbylljen e votimit, kryetari, në praninë e anëtarëve të komisionit sipas radhës, kryen veprimet e mëposhtme:
  - a. shënon numrin e zgjedhësve që kanë votuar duke numëruar nënshkrimet e bëra në listën përkatëse të zgjedhësve të cilët kanë votuar sipas kushteve të parashikuara në këtë rregullore.
  - b. iu deklaron me zë të lartë shifrat anëtarëve të tjerë të komisionit;
  - c. i fton ata të verifikojnë shifrat e thëna prej tij.
2. Në rast kundërshtimesh për përcaktimin e shifrës, pretendimet shënohen në procesverbal.
3. Kryetari, nën vëzhgimin e të gjithë anëtarëve të komisionit, i numëron fletët e votimit të dëmtuara që gjenden në zarfën e "Fletëvotimi të dëmtuara" për secilën kategori. Numri i fletëve të votimit të dëmtuara pasqyrohet në procesverbalin për "Mbylljen e votimit".



4. Kryetari, nën vëzhgimin e të gjithë anëtarëve të komisionit numëron dhe fletët e papërdorura dhe i vendos ato në zarfin përkatës. Numri i fletëve të votimit të papërdorura pasqyrohet në procesverbalin për "Mbylljen e votimit".
5. Kryetari i KZS bashkë me anëtarët e tjerë të komisionit, dorëzojnë në KIZS e UART kutitë e votimit bashkë me materialet zgjedhore të qendrës së votimit.
6. Procesi vijues i vlerësimit dhe nxjerrjes së rezultatit për zgjedhjet e këshillit studentor sipas fakulteteve të UART, kryhet nga KIZS dhe vazhdon pa ndërprerje deri në nxjerrjen e rezultatit përfundimtar.

#### **Neni 24**

#### **Vlerësimi, numërimi i votave dhe nxjerrja e rezultatit për zgjedhjet e Këshillit Studentor të UART**

1. Procesi i vlerësimit, numërimit dhe nxjerrjes së rezultatit për zgjedhjet e këshillit studentor të UART, sipas fakultetit kryhet nga KZS përkatëse dhe vazhdon pa ndërprerje deri në nxjerrjen e rezultatit përfundimtar.
2. Kryetari i KZS nxjerr nga kutia e votimit fletët e votimit, i shpalos dhe i vendos mbi tryezë, me pjesën e pasme të fletës nga ana e sipërme. Pas kësaj, ai:
  - a. vlerëson të gjitha votat e gjetura në kuti, duke ia treguar të anëtarëve të KZS. Votat e pavlefshme ndahen në një grup të veçantë;
  - b. numëron votat e vlefshme dhe votat e pavlefshme. Numri i tyre, së bashku me numrin e përgjithshëm të votave të gjetura në kuti shënohen në procesverbal;
  - c. verifikon numrin e përgjithshëm të votave të gjetura në kuti në bazë të të dhënave të procesverbalit të hartuar nga KZS përkatëse, sipas përcaktimeve të kësaj rregulloreje, për numrin e përgjithshëm të fletëve të votimit, fletëve të votimit të papërdorura dhe fletëve të votimit të dëmtuara.
  - d. shënon rezultatin në procesverbal
  - e. harton tabelën përfundimtare për kutinë përkatëse dhe e miraton me vendim.
3. Vota të pavlefshme janë fletët e votimit kur:
  - a. fleta e votimit nuk ka të njëjtën madhësi, ngjyrë ose formë me fletën e votimit të miratuar nga KIZS;
  - b. fletës së votimit i mungojnë vulat;
  - c. në fletën e votimit janë bërë shënime apo shenja që bëjnë të pamundur vlerësimin e votës;
  - d. në fletën e votimit janë bërë shënime në favor ose në disfavor të studentit kandidat;
  - e. është votuar në tejkalim të përcaktimeve në fletët e votimit;
  - f. nuk është votuar për asnjë kandidat.
4. Pas përfundimit të vlerësimit dhe numërimit të votave, KZS harton tabelën përfundimtare të rezultatit të votimit sipas numrit të votave.
5. Tabela përfundimtare dhe vendimi përkatës i KZS, si edhe të gjitha procesverbalet e tjera nënshkruhen nga të gjithë anëtarët dhe kryetari, duke deklaruar votën "pro" ose "kundër".
6. Kopje e tabelës përfundimtare të rezultatit të votimit u jepet, sipas kërkesës, kandidatëve.
7. Çdo kontestim apo vërejtje e kandidatëve, shënohet detyrimisht në procesverbal nga sekretari i KZS.
8. Në përfundim të procesit të vlerësimit dhe numërimit të votave, në prani të KZS dhe/ose kandidatëve të pranishëm;
  - a. futen dhe administrohen në kutinë e votimit fletët e votimit të numëruara të vlefshme dhe të pavlefshme;
  - b. futet dhe administrohet në kutinë e materialeve zgjedhore zarfi "Fletëvotimi të papërdorura";



- c. futet dhe administrohet në kutinë e materialeve zgjedhore zarfi “Fletëvotimi të dëmtuara”
- d. futet dhe administrohet në kutinë e materialeve zgjedhore procesverbal për numrin e fletëve të votimit, numrin e fletëve të papërdorura dhe numrin e fletëve të dëmtuara, si edhe tabela përfundimtare e rezultatit të votimit për KZS.
9. Kryetari i KZS mbyll kutitë e votimit dhe shënon në procesverbal elementet e sigurisë (kodet) për mbylljen e këtyre kutive.
10. Dorëzimi i materialeve zgjedhore dhe i kutive të votimit në KIZS bëhet nga kryetari i KZS, me procesverbal, në prani të anëtarëve të KZS përkatëse dhe/ose kandidatëve, menjëherë pas përfundimit të proceseve të përshkruara në këtë rregullore.

### **Neni 25**

#### **Shpallja e rezultatit paraprak të zgjedhjeve për Këshillin Studentor të UART.**

1. Pas përfundimit të vlerësimit dhe numërimit të votave, nxjerrjes së rezultatit të votimit nga gjithë KZS dhe dërgimit të tyre në KIZS, ky i fundit, brenda 24 orëve, harton tabelën e rezultateve të votimit dhe shpall, me vendim të veçantë, rezultatet e zgjedhjeve për anëtarët e këshillit studentor të Universitetit të Arteve.
2. Tabela e rezultateve zgjedhore dhe vendimi i KIZS nënshkruhen nga të gjithë anëtarët.
3. Kopje e tabelës përfundimtare të rezultatit të zgjedhjeve u jepet, sipas kërkesës, kandidatëve.

### **Neni 26**

#### **Ankimimet**

1. Kundër vendimeve të KIZS për shpalljen e tabelave përfundimtare të rezultatit të zgjedhjeve, ankimimi bëhet nga kandidatët në KIZS jo më vonë se 2 (dy) ditë pune nga data e shpalljes së tyre. Për efekt të llogaritjes së afatit, periudha 2 ditore fillon në orën 16:00 të ditës së shpalljes së aktit për të cilin bëhet ankimimi dhe përfundon në orën 16:00, pas dy ditë pune KIZS administron dhe merr vendime për ankimimet jo më vonë se 48 orë pas paraqitjes së tyre.
2. Kundër vendimeve të KIZS për ankesat e kandidatëve për rezultatin e zgjedhjeve, apelimi i vendimit bëhet nga kandidatët në Komisionin e Apelit Studentor (KAS) jo më vonë se 2 (dy) ditë pune nga data e marrjes së vendimit, Për efekt të llogaritjes së afatit, periudha 2 ditore fillon në orën 16:00 të ditës së shpalljes së aktit për të cilin bëhet ankimimi dhe përfundon në orën 16:00, pas 2 (dy) ditë pune.
3. Me përfundimin e procesit të shqyrtimit të ankimimeve të dërguara nga Komisioni i Apelit Studentor, KIZS shpall, me vendim të veçantë, rezultatet përfundimtare të zgjedhjeve. Data e thirrjes së mbledhjes së parë të këshillit studentor të UART caktohet nga KIZS. Kjo datë shënon edhe fillimin e punës së këshillit studentor të Universitetit të Arteve.

### **Neni 27**

#### **Zgjedhja e kryetarit të Këshillit Studentor të Universitetit të Arteve**

1. Pas përfundimit të afateve të apelimit, organizohet mbledhja e parë e Këshillit Studentor të Universitetit të Arteve e cila thërritet nga KIZS jo më vonë se dy javë nga ky afat. Në këtë mbledhje marrin pjesë të gjithë anëtarët e shpallur fitues nga zgjedhjet e zhvilluara për këshillin studentor në fakultetet e UART. Në këtë mbledhje bëhet konstituimi i Këshillit Studentor dhe anëtarët e këtij këshilli, zgjedhin mes tyre me votim të fshehtë kryetarin e Këshillit Studentor të



Universitetit të Arteve, Tiranë, i cili vetëkandidohet ose propozohet nga anëtarët e këshillit studentor të UART.

2. Mandati i kryetarit të Këshillit Studentor të UART-së është 2vjeçar.

### **Neni 28**

#### **Pavlefshmëria e zgjedhjeve**

1. KIZS, kryesisht ose me kërkesë të kandidatëve, i shpall zgjedhjet të pavlefshme në një ose më shumë qendra votimi, në rast se:
  - a. kanë ndodhur shkelje të ligjit;
  - b. mund të jetë cenuar procesi zgjedhor në një masë të tillë, që mund të ketë ndikuar në fitimin e mandateve;
  - c. kanë ndodhur fatkeqësi natyrore në përmasa të tilla që kanë penguar pjesëmarrjen e zgjedhësve në votim.
2. Kërkesën për pavlefshmëri të zgjedhjeve, kërkuesi duhet ta shoqërojë me shpjegimin për arsytet ligjore ku mbështetet kërkesa, përshkrimin e shkeljeve të pretenduara dhe arsyetimin e detajuar të tyre për pasojat që kanë prodhuar. Shqyrtimi i kërkesës për pavlefshmëri të zgjedhjeve dhe vendimmarrja për kërkesën, bëhet nga KIZS, jo më vonë se 2 (dy) ditë pune nga depozitimi i saj.

### **Neni 29**

#### **Dispozita të fundit**

1. I gjithë dokumentacioni zgjedhor ruhet në arkivin e Këshillit Studentor të UART, në bazë të rregullave të përcaktuara në kuadrin ligjor për administrimin, ruajtjen dhe arkivimin e dokumentacionit.
2. Në rast të mbarimit të parakohshëm të mandatit të një prej anëtarëve të Këshillit Studentor të UART, ai zëvendësohen nga kandidati pasardhës në renditje për nga numri i votave të grumbulluara në zgjedhje nga fakulteti të cilit i përket anëtari që i është ndërprerë mandati, deri në përfundim të mandatit të nisur.
3. Të drejtën e interpretimit të kësaj rregulloreje, e ka Komisioni Institucional Zgjedhor i Universitetit të Arteve i cili mund të ofrojë mbështetje përgjatë të gjithë procesit.
4. Të gjitha shpenzimet për procesin zgjedhor për Këshillin Studentor të UART, do të mbulohen nga vetë Universiteti i Arteve.
5. Kjo rregullore është e detyrueshme për t'u zbatuar si e tillë nga të gjitha strukturat studentore të Universitetit të Arteve dhe hyn në fuqi menjëherë pas miratimit nga Senati Akademik i UART.

